



## 賊牯

吾老屋在當單純、當恬靜个東勢莊下，鄰舍當互相，係一個當有人情味个好所在。因致讀書、食頭路較方便，吾等搬到臺中戴，毋過，一到放寮日，吾等姊妹斯會相招共下轉老屋戴兩日。平常時，鄰舍也會同吾等掃掌屋，分吾等當安心。

半年前，禮拜六臨晝，佢先轉到老屋，一落車斯試著怪怪——仰脣鎖好个廳下門會留一縫？行俚去看，阿姆唉唷！地泥下留有一支當粗、當長个擰篋同一隻手落，撬壞个鎖頭散都一地泥，連門都撬壞撇咧。佢著驚下，驚怕係有賊牯來搵東西，也毋知這賊還有因在屋家肚無？黏時先打電話去派出所報案，過催老弟遽遽轉來處理，電話打撇，正注意著自家个手緊掣，心臟像打鼓樣咚咚滾緊跳。

過十分鐘左右，派出所个巡佐同里長共下趕到位。巡佐戴核手落細義打開門，先入到屋家肚巡過一遍，確定賊無在屋肚，正分吾等入去看有打毋見麼个無。無幾久，鑑識組个人員來採證據，鄰舍看著巡查車停在吾屋面前，也來關心。去派出所做好筆錄，里長也拜託巡佐同巡查愛加強巡邏，還分莊項人安全同安心。

毋過，一個月過撇，無捉著賊無打緊，該賊又來咧！同正正好个門、新安个鎖做下撬壞。三禮拜後，賊又來咧，吾等共樣又報案、整理、修換門鎖。過一個月左右，賊過來咧，屋肚地泥下有兩隻當清楚的泥鞋印，巡佐又帶核鑑識組个人來採證據，厥等還安慰吾等講，這擺有鞋印，應該尋得著該個賊咧。

其實，老屋肚除撇電視、冰箱、簡單个音響同兩臺舊電腦以外，還有幾隻細漢時用來囤銀角个人公，也無麼个值錢个東西咧！正經無想著，該賊牯會密密來搵，音響、錄影機、囤銀角个人公先拿走，過來電扇、電鑊、吹風機也好，臨尾，連運動鞋、枕頭、毯、茶籐粉也搬搬走。分賊牯拿走恁多東西，其實無值幾多錢，毋過門鎖換了換，該賊牯還係撬撬壞，還同間項門个鎖拍壞撇，門也用斧頭破去大嫫空，完全無法度修整。屋家畀搵去鬻交交，愛當多時間、當多精神來修理同整理，實在還搵人。該站時間，見愛轉老屋，吾心肝頭斯撈撈，又愁又煩、又譴又驚，十分艱苦。

老弟个同學知著，跔跔來同吾等安攝影機，佢講：「巡查捉毋著，偲自家來捉。」安好攝影機个第三日，老弟半夜看著手機傳來賊牯跋圍牆入吾屋家个影像，遽遽聯絡派出所，巡佐帶兩個巡查在吾屋面前晡賊，該賊牯背緊布袋，跋上圍牆躍落來，人盲企在，巡查斯同佢揪緊，捉轉去派出所咧！

賊捉著咧，莊項个安全、安心尋轉來咧！這下，佢毋使見轉去老屋斯愁，實在當好。希望該賊牯，使得好好做人，認真尋頭路做，莫過行歪路，害人也害自家。

作者：徐姿華

### ☆詞彙學習☆

【掌屋】zhongˊ vugˊ：看家。

【心肝頭撈撈】sim+ gon+ teuˊ zadˊ zadˊ：心中  
如有巨石壓住，積聚不舒暢。

【擰篋】zunˊ be+：螺絲起子。

【鬻交交】nungˊ gauˊ gauˊ：亂七八糟。

【晡賊】puˊ cedˊ：在暗處偵伺著小偷的行動，以便捉捕。